



Grad Sarajevo
City of Sarajevo

Bosna i Hercegovina
Federacija Bosne i Hercegovine
Kanton Sarajevo
Grad Sarajevo
GRADSKO VIJEĆE

Odluka
o načinu provođenja javnog interesa Grada Sarajeva u sportu
(Prijedlog)

Predlagač: Gradonačelnica
Obrađivač: Gradska služba za obrazovanje, sport
kulturu i mlade

Sarajevo, novembar 2023. godine

Adresa: Hamdije Kreševljakovića 3
71000 Sarajevo, BiH
Tel: +387 33 216 659
Fax: +387 33 205 874
Email: gsgv@sarajevo.ba
Web: gradskovijece.sarajevo.ba



Na osnovu člana 48. st. (2) i (4) Zakona o sportu („Službene novine Kantona Sarajevo“, broj 45/12 – Prečišćeni tekst i 36/21) i člana 31. stav (1) tačka b) Statuta Grada Sarajeva („Službene novine Kantona Sarajevo“, broj 7/23) Gradsko vijeće Grada Sarajeva, na __. sjednici održanoj dana __. __. 2023. godine, donijelo je:

(Prijedlog)

**Odluku
o načinu provođenja javnog interesa Grada Sarajeva u sportu**

POGLAVLJE I. OPĆE ODREDBE

**Član 1.
(Predmet Odluke)**

Ovom odlukom utvrđuje se način provođenja javnog interesa Grada Sarajeva (u daljnjem tekstu: Grada) u sportu.

POGLAVLJE II. JAVNI INTERES GRADA I DEFINICIJE U SPORTU

**Član 2.
(Javni interes Grada)**

- (1) Javni interes Grada u sportu, propisan odredbama Zakona o sportu (u daljnjem tekstu: Zakona) je:
- a) izgradnja, obnova i održavanje sportskih objekata od interesa za Grad,
 - b) razvojni sport,
 - c) organizacija sportskih manifestacija masovnog karaktera,
 - d) sportski odgoj i obrazovanje u srednjim školama i fakultetima na području Kantona;
 - e) usavršavanje stručnog kadra,
 - f) saradnja sa olimpijskim gradovima,
 - g) evidencija za područje Grada.
- (2) Javni interes Grada u sportu, shodno finansijskim sredstvima koja se obezbjeđuju u Budžetu Grada Sarajeva za njegovo ostvarivanje su sljedeće aktivnosti:
- a) razvojni sport,
 - b) vrhunski sport,
 - c) nagrade za ostvarene vrhunske sportske rezultate (pojedinačne),
 - d) nagrade za ostvarene vrhunske sportske rezultate (klupske).

**Član 3.
(Sportski objekti)**

Sportski objekti iz člana 2. stav (1) tačka a) ove odluke su oni objekti koji ispunjavaju uslove za gradska i međugradska takmičenja u skladu sa Listom sportskih objekata od interesa za Grad Sarajevo, koju usvaja Gradsko vijeće Grada Sarajeva.

**Član 4.
(Razvojni sport)**

Razvojni sport iz člana 2. stav (1) tačka b) ove odluke je priprema i takmičenje pojedinaca i ekipa koji su svojim stručnim i organizacijskim mogućnostima prevazišli sport za sve, a nisu ostvarili vrhunske sportske rezultate.

Član 5.
(Organizacija sportskih manifestacija)

- (1) Organizacija sportskih manifestacija masovnog karaktera iz člana 2. stav (1) tačka c) ove odluke je organizacija onih sportskih manifestacija masovnog karaktera koje imaju za cilj afirmaciju Grada, odnosno prepoznatljiv interes Grada u smislu afirmacije i popularizacije sporta kao svjetskog civilizacijskog dostignuća.
- (2) Organizacija sportskih manifestacija masovnog karaktera iz stava (1) ovog člana podrazumijeva i sportske priredbe i velike međunarodne sportske priredbe koje se održavaju na području Grada.
- (3) Sportske priredbe iz stava (2) ovog člana su organizovani sportski susreti i takmičenja u sportu u skladu sa općim uslovima koje propisuje odgovarajući međunarodni strukovni sportski savez.
- (4) Velike međunarodne sportske priredbe iz stava (2) ovog člana su:
 - a) olimpijske i paraolimpijske igre,
 - b) svjetska i evropska prvenstva,
 - c) univerzijade,
 - d) mediteranske igre,
 - e) svjetski kupovi i završni turniri evropske i svjetske lige,
 - f) zimski i ljetni olimpijski festival mladih Evrope,
 - g) balkanska i druga regionalna prvenstva,
 - h) kriterijumski i kvalifikacioni međunarodni sportski turniri,
 - i) tradicionalne međunarodne sportske manifestacije koje su u kalendaru međunarodnih sportskih asocijacija.

Član 6.
(Obaveze organizatora manifestacija)

- (1) Subjekti koji organizuju sportske manifestacije masovnog karaktera iz člana (5) ove odluke moraju:
 - a) dobiti prethodnu saglasnost Ministarstva civilnih poslova Bosne i Hercegovine i Ministarstva kulture i sporta Federacije Bosne i Hercegovine;
 - b) obezbijediti uslove koji su predviđeni pravilima međunarodnih sportskih asocijacija;
 - c) dobiti prethodnu saglasnost Gradskog vijeća Grada Sarajeva na prijedlog gradonačelnika/ce za podnošenje kandidature kod odgovarajućeg međunarodnog sportskog saveza;
 - d) dobiti saglasnost odgovarajućeg sportskog saveza na državnom nivou ili Olimpijskog komiteta Bosne i Hercegovine;
 - e) utvrditi inicijativno tijelo za cjelokupnu pripremu kandidature;
 - f) izraditi i predložiti gradonačelniku/ci elaborat o organizovanju i finansiranju sportske priredbe.
- (2) Obaveze iz stava (1) ovog člana odnose se na sve velike sportske priredbe, čak i ako je organizator sam obezbijedio sredstva.

Član 7.
(Sportski odgoj i obrazovanje)

Sportski odgoj i obrazovanje na području Kantona iz člana 2. stav (1) tačka d) ove odluke je sportska aktivnost djece i omladine koja se obavlja u nastavno-obrazovnom procesu na svim nivoima obrazovanja (predškolsko, osnovno, srednje i visoko) ili izvan nastavno-obrazovnog procesa neovisno o obliku pojavljivanja.

Član 8.
(Usavršavanje stručnog kadra)

Usavršavanje stručnog kadra iz člana 2. stav (1) tačka e) ove odluke je finansijska podrška za stručno usavršavanje kadra obrazovnih ustanova i registrovanih organizacija u sportu od značaja za Grad.

Član 9.
(Saradnja sa olimpijskim gradovima)

Saradnja sa olimpijskim gradovima iz člana 2. stav (1) tačka f) ove odluke odvijat će se s ciljem očuvanja olimpijskog duha, uzajamnog poštovanja i razmjene iskustava unutar zajednice olimpijskih gradova, te poštivanja osnovnih principa Olimpijske povelje.

Član 10.
(Evidencija za područje Grada)

Evidencija za područje Grada iz člana 2. stav (1) tačka g) ove odluke, ukoliko za istom postoji potreba, uspostavlja se i vodi na način propisan Zakonom i drugim pozakonskim aktima.

Član 11.
(Vrhunski sport)

Vrhunski sport iz člana 2. stav (2) tačka b) ove odluke je priprema i takmičenje pojedinaca i ekipa koji su na najvećim međunarodnim takmičenjima ostvarili vrhunski rezultat.

Član 12.
(Nagrade pojedincima i klubovima)

Nagrade pojedincima i klubovima iz člana 2. stav (2) tačka c) i d) su nagrade za postignute vrhunske sportske rezultate.

Član 13.
(Druge aktivnosti)

Grad može utvrditi i druge aktivnosti kao javni interes Grada u sportu, ukoliko se obezbijede sredstva za njihovo ostvarivanje.

Član 14.
(Saradnja sa drugim organima)

Radi ostvarivanja javnog interesa u sportu, Grad će putem nadležne službe obezbjeđivati međusobnu saradnju sa nadležnim organima Kantona Sarajevo, općina i drugim nadležnim organima.

POGLAVLJE III. USTANOVE U SPORTU

Član 15.
(Osnivači ustanova)

Za provođenje poslova iz člana 2. ove odluke, Grad može osnovati javnu ustanovu, pod uslovima utvrđenim zakonom.

Član 16.
(Prijenos prava raspolaganja)

- (1) U vršenju prava raspolaganja sportskim objektima od značaja za Grad, Gradsko vijeće može putem konkursa prenijeti pravo korištenja i upravljanja nad tim objektima na druga pravna i fizička lica koja organizuju aktivnosti u sportu.
- (2) Pravo upravljanja i korištenja sportskim objektima, prenosi se ugovorom kojim se uređuju međusobna prava i obaveze, a naročito uslovi kojima se obezbjeđuje namjensko, potpuno i racionalno korištenje, kao i čuvanje i održavanje sportskih objekata.

Član 17.
(Namjena sportskih objekata)

- (1) Namjena sportskih objekata od značaja za Grad ne može se mijenjati.
- (2) Izuzetno, u slučaju da Gradsko vijeće da saglasnost da se mijenja namjena sportskog objekta, Grad je obavezan da obezbijedi objekat iste namjene.

POGLAVLJE IV. AKTIVNOSTI OD JAVNOG INTERESA I NAČIN NJIHOVOG FINANSIRANJA

Član 18.
(Aktivnosti od javnog interesa)

Aktivnosti od javnog interesa Grada u sportu, za koje Grad obezbjeđuje sredstva, i koje će finansirati iz Budžeta Grada Sarajeva su:

- a) podrška razvojnom sportu,
- b) podrška vrhunskom sportu,
- c) nagrade za ostvarene vrhunske sportske rezultate (pojedinačne),
- d) nagrade za ostvarene vrhunske sportske rezultate (klupske).

Član 19.
(Organizacije u sportu i Javni poziv)

- (1) Organizacije u sportu – klub, sportsko društvo, sportski savez i organizacije za podršku sporta, definirane Zakonom, koje svojim djelovanjem ostvaruju javni interes Grada u sportu, mogu dostaviti svoje programe i projekte putem javnog poziva, čime se osigurava transparentnost dodjele finansijskih sredstava i omogućava dobijanje što većeg broja prijava, odnosno odabir najkvalitetnijih programa i projekata.
- (2) Gradonačelnik/ca Grada Sarajeva jednom godišnje raspisuje javni poziv, i to:
 - a) Javni poziv za sufinansiranje programa, projekata u sportu iz Budžeta Grada Sarajeva iz oblasti razvojnog sporta,
 - b) Javni poziv za sufinansiranje programa, projekata u sportu iz Budžeta Grada Sarajeva iz oblasti vrhunskog sporta.
- (3) Javni pozivi se objavljuju na službenoj web stranici Grada Sarajeva i sadrže uslove i kriterije koje organizacije u sportu moraju ispunjavati, rok i način za podnošenje prijava, te druge potrebne podatke, propisane ovom odlukom i Pravilnikom o kriterijima za finansiranje javnog interesa Grada u sportu.

Član 20.
(Nagrade pojedincima i klubovima)

Nagrade za ostvarene vrhunske sportske rezultate (pojedinačne) i nagrade za ostvarene vrhunske sportske rezultate (klupske) bit će dodjeljivane na način i u skladu sa kriterijima utvrđenim Pravilnikom o kriterijima za finansiranje javnog interesa Grada u sportu.

POGLAVLJE IV. ZAVRŠNE ODREDBE

Član 21.
(Donošenje Pravilnika)

Gradonačelnik/ca Grada Sarajeva će po stupanju na snagu ove odluke donijeti Pravilnik o kriterijima za finansiranje javnog interesa Grada u sportu, kojim će se detaljno regulirati način i kriteriji za dodjelu sredstava iz Budžeta Grada Sarajeva za finansiranje javnog interesa Grada iz člana 18. ove odluke, od uslova za raspisivanje Javnog poziva, kriterija za sufinansiranje programa i projekata u sportu, kriterija o vrsti i načinu dodjele nagrada za ostvarene vrhunske sportske rezultate i drugog neophodnog za finansiranje aktivnosti od javnog interesa Grada.

Član 22.
(Sredstva za finansiranje)

Sredstva za finansiranje aktivnosti od javnog interesa Grada u sportu iz člana 18. tačka a)-d) planiraju se svake godine u Budžetu Grada Sarajeva za narednu godinu.

Član 23.
(Izmjene i dopune)

Izmjene i dopune ove odluke vrše se na način i po postupku za njeno donošenje.

Član 24.
(Prestanak važenja)

Stupanjem na snagu ove odluke prestaje da važi Odluka o načinu provođenja javnog interesa Grada Sarajeva u oblasti sporta („Službene novine Kantona Sarajevo“, broj 5/06).

Član 25.
(Stupanje na snagu)

Ova odluka stupa na snagu narednog dana od dana objavljivanja u „Službenim novinama Kantona Sarajevo“.

PREDSJEDAVALJUĆI GRADSKOG VIJEĆA

Jasmin Ademović

Broj:
Sarajevo, __. __.2023. godine

OBRAZLOŽENJE

PRAVNI OSNOV

Pravni osnov za donošenje Odluke sadržan je člana 48. st. (2) i (4) Zakona o sportu kojim je propisan javni interes Grada u sportu, kao i da Grad svojom odlukom utvrđuje način provođenja javnog interesa, odnosno da Grad može utvrditi i druge aktivnosti kao svoj interes, ukoliko obezbijedi sredstva za njihovo ostvarivanje. Pravni osnov je sadržan i u članu 31. stav (1) tačka b) Statuta Grada Sarajeva kojim je propisano da Gradsko vijeće donosi odluke, druge propise i opće akte i daje njihovo tumačenje.

RAZLOZI DONOŠENJA

Grad Sarajevo je u cilju realizacije obaveze propisane Zakonom o sportu trebao da donese Odluku o načinu provođenja javnog interesa Grada Sarajeva u sportu. Kako je dosadašnja Odluka o načinu provođenja javnog interesa Grada Sarajeva u oblasti sporta, samo utvrdila javni interes shodno zakonu, ona je u svom većem dijelu bila teško provodiva, te je faktički samo predstavljala izvršenje zakonske obaveze, dok je u praksi, zbog nedostataka niza potrebnih elemenata, bila slabo primjenljiva. Bez obzira na izneseno, Grad Sarajevo je shodno raspoloživim finansijskim sredstvima nastavio da sufinansira brojne sportske manifestacije, programe, projekte i sl. U tom smislu, poslije višegodišnje pauze, raspisan je i Javni poziv za sufinansiranje programa i projekata u sportu, kao način podrške kojim se osigurava transparentnost dodjele finansijskih sredstava, omogućava dobijanje što većeg broja prijava, odnosno odabir najkvalitetnijih programa i projekata čijom se realizacijom doprinosi promociji i realizaciji pozitivnih sportskih vrijednosti grada Sarajeva. Dosadašnja saradnja sa brojnim organizacijama u sportu ukazala je da su brojni kvalitetni programi i projekti koji zaslužuju da budu podržani, pa se samim tim pristupilo, kako izvršavanju zakonske obaveze, tako i utvrđivanju aktivnosti od javnog interesa Grada, koje će Grad Sarajevo u skladu sa raspoloživim finansijskim sredstvima sufinansirati putem javnog poziva, odnosno u skladu sa ovom odlukom i Pravilnikom o kriterijima za finansiranje javnog interesa Grada u sportu. Shodno naprijed navedenom, Gradsko vijeće Grada Sarajeva donijelo je ovu odluku.

OBRAZLOŽENJE PREDLOŽENIH RJEŠENJA

Članom 1. i članom 2. Odluke utvrđuju se opće odredbe i javni interes Grada.

Članom 3 i članom 4. definiran je pojam sportskih objekata i razvojnog sporta.

Članom 5. i članom 6. definiran je pojam organizacije sportskih manifestacija i obaveza subjekata koji iste organizuju.

Članom 7. i članom 8. definiran je pojam sportskog odgoja i obrazovanja i usavršavanje stručnog kadra.

Članom 9. i članom 10. propisana je saradnja sa olimpijskim gradovima i vođenje evidencije za područje Grada.

Članom 11. i članom 12. definiran je pojam vrhunskog sporta i nagrada pojedincima i klubovima.

Članom 13. i članom 14. propisane su druge aktivnosti i saradnja sa drugim organima.

Članom 15. i članom 16. propisana je mogućnost osnivanja ustanova i mogućnost prenošenja prava korištenja i upravljanja sportskim objektima na druga lica.

Članom 17. propisano je da se namjena sportskih objekata od značaja za Grad ne može mijenjati.

Članom 18. propisane su aktivnosti od javnog interesa Grada.

Članom 19. propisano je koje organizacije u sportu mogu dostavljati svoje programe i projekte, kao i obaveza raspisivanja javnog poziva za sufinansiranje istih.

Članom 20. propisana je upućujuća odredba dodjeljivanja nagrada pojedincima i klubovima.

Članom 21. i članom 22. propisana je obaveza donošenja Pravilnika i potreba planiranja sredstava za finansiranje javnog interesa Grada u sportu.

Članom 23., članom 24. i članom 25. propisuje se način izmjena i dopuna Odluke, prestanak važenja ranijeg propisa, te stupanje na snagu Odluke.

FINANSIJSKA SREDSTVA

Finansijska sredstva za realizaciju ove odluke nisu potrebna, a finansijska sredstva za realizaciju aktivnosti od javnog interesa Grada u 2024. godini, bit će obezbijedena u Budžetu Grada Sarajeva za 2024. godinu.